

GECHI-INENDAAGWAK: GAA-NAAGWASINOG GAA-IZHISEG GAABAN GANEDAT IZHICHIGEWINAN




Gaaban ganedat izhichigewinan gaa-dibendamowaad odoozhitoonaawaan gaaban ganedat bizaanigo bangii eta gii-bagidinamowaad ini GHG gemaa gii-odaapinamowaad gaye gii-onji-odaapinamowaad GHG ishpiming, gaa-inindwaa offset inaakonigewining onji. Iwe GHG nawach bangii ji-bagijiseg gemaa ji-odaapinigaadeg imaa izhichigewining onji daa-dibaginjigaade (ji-dibaabiishkoojigaadeg gaye ji-gikenjigaadeg) gaa-gikendang awiya ji-doodang gaaban ganedat inaakonigewining izhi.

Aanind gaaban ganedat izhichigewinan ono:

- Nawach babenak ji-naagajichigaadegin mitigwakiin ji-ayaamagak iwe gaa-bagidanaamoying mitigong / azhashkiing.
- Ji-manaa-bagijiseg iwe anaamakamig gaa-onjiimagak gaa-naagwasinog imaa gaa-izhiningwa'igaadeg azhashki akiing.
- Ji-naadamawindwaa mitigoog gaye mashkosi ji-aabajitoosigwaa igi gaa-waakaa'igewaad (ji-bagijisesinog gaa-naagwasinog)
- Ji-aabajichigaadeg bakaan gegoon imaa dakisijiganing gaawiin dash ji-onji-gizhidesinog aki miziwe.
- Ji-izhichigeng ji-wanaadak webinigan apiichwiin webiniganikaang ji-izhi-webinigaadeg
- Ji-nitaawigi'indwaa mitigoog

- Ji-odaapinigaadeg gaa-naagwasinog bizhikiwi-moowing gaa-ayaag.
- Nawach niibiwa bagidanaamowin daaganawenjigaade gitigewini-azhashkiing minochigaadeg azhashki ji-mino-nitaawigig gitigaan.

Gaaban ganedat izhichigewinanowe daa-inaakonigem nawach niibiwa ji-debweyen-damowaad awiyag ji-onzhishing iwe izhichigewin. Iwe izhichigewin odaa-biminizhaan ji-minoseg ji-ozhi'oomagakin ini gaaban ganedatan.





Gaa-ayaamagak geget:

Iwe gaaban ganedat izhichigewin geget bangii GHG o-daa-bagidinaanaawaa ishpiming gemaa ji-odaapinamowaad ji-dibaabanjigaadenig dash. Iwe izhichigewin gaa-dibendang daa-waabanda'iwe nawach bangii GHG ji-bagidinang gemaa ji-odaapinang.

Giiyaabi dash:

Iwe gaaban ganedat izhichigewin nawach bangii GHG gemaa o-daa-odaapi-naanaawaan apiich wiin ge-gii-izhisemagakiban giishpin ayaasino-giban iwe gaaban ganedat izhichigewin, ge-izhisemagakiban isa go.

Nawach bangii GHG bagidinigaadeg gemaa odaapinigaadeg gaawiin memwaach ayaamagak izhichigewin, gaan giiyaabi da-ayaasinoon.

Ge-dibaginjigaadeg:

Iwe izhichigewin gaa-dibendang gwayak daa-dibaajimo bangii eta gii-bagidinang GHG gemaa gii-odaapinang, gaa-inaakonigeng ji-doodamowaad gaa-gii-inindwaa. O-daa-aabajitooon gaa-gii-inind ji-aabajitood gaye dibaabiishkooji-gan ji-aabajitood ji-maawadoonang GHG gikendaasowin.

Aabiding eta:

Gaaban ganedat izhichigewin daa-biindigebii'igaade aabiding eta gii-izhiseg gaye bangii eta GHG bagidinigewinan ganedat aabiding daa-aabadan. Aabiding eta ayaamagak gaawiin niizhing daa-agingjigaadesinoon iwe, mii dash ozaam daa-ishpi-agingjigaade maamaw GHG gaa-bagidinigaadeg imaa gaaban ganedat izhichigewining.

Ge-debweyendaagwak:

Daa-maawadoonigaade gekenjigaadeg iwe izhichigewin gaye ji-ozhibii'igaadeg awiya bakaan gaa-gikendaasod ji-waawaabandang gaye ji-ikidod edebwemagak.



Nepich igo:

Maagizhaa daa-ganawenjigaade iwe gaa-bagidanaamong gaa-naagwasinog ji-bagidinigaadeg ani-akiiwang (bizaanigo gemaa gaawiin bizaanigo). Ini izhichigewinan nawach niibiwa gaa-odaapinamowaad gaye gaa-ganawendamowaad CO₂ gitigaaning mitigong azhashkiing asiniing gemaa gaa-bagidinanzigwaa ji-bagidinigaadeg iwe gaa-bagidanaamong, awe izhichigewin gaa-dibendang daa-nepiji-odaapinaan GHG gemaa nawach bangii eta ji-bagidinang ishpiming.

- Gaaban ganedat izhichigewinan ikidoomagan gii-ganawenjigaadeg iwe CO₂ gaa-bagidanaamong ginwesh igo ji-ganawenjigaadeg daabishkoo 100 daso-biboon gaa-ishkwaa-ozhi'oomagakin gaaban ganedatan.
- Gaaban ganedatan gaa-naagajitooaad o-daa-ganawendaanaawaan bangii ini gaaban ganedatan maagizhaa bichi-bagidinigaadeg iwe CO₂ gaa-bagidanaamong ishpiming ani-akiiwang.
- Giispin izhichigewin gaa-dibendang bagidinang iwe CO₂ onjida (gii-shka'aakwed), daa-diba'ige'aa ji-giiwe-diba'ang ini credits gaa-gii-miinind.

Dago dash ono, iwe gaaban ganedat izhichigewin o-da-biminizha'aanan inaakoni-gewinan wegonenan izhichigewinan ge-dagwiimagakin imaa.



Minik ako

Da-ikidoomagan aaniin ge-izhichiged awe izhichigewin gaa-dibendang ji-biindigebii'ang gaaban ganedatan. Apii gaa-gii-maajitaad, aaniindi eyaad, ezhichigemagak iwe izhichi-gewin gaye giishpin nawach bangii GHG gaa-bagidinigaadegin gemaa gaa-odaapinigaadegin.



Apii Gaa-gii-maajitaamagak Izhichigewin

Apii gaa-maajitaamagak izhichigewin iwe apii gaa-gii-maadakami-giziwaad imaa. Apii gaa-maajitaamagak izhichigewin ikidowag igi gaa-inaakonige-waad mii dash wiinigo apii gaa-gii-maadanokiiwaad gemaa apii nawach bangii GHG gaa-gii-bagidinamowaad gii-maajitaawag. Gichi-inendaagwan ji-gikenjigaadeg aan apii gaa-gii-maajitaawaad aaniish giishpin ozaam wiiba gaa-gii-maajitaawaad gaawiin giyaabi dash da-inenjigaadesinooon iwe gaaban ganedat izhichigewin. Mayaa iwe apii gaa-gii-bagidinind ji-maajitaad daa-maajitaamagan iwe izhichigewin ji-biindigebii'igaadeg imaa systeming.

Aaniindi Eyaamagak Izhichigewin

Ini gaaban ganedat izhichigewinan gaye inakonigewin da-ikidom aaniindi mayaa edanakamigiziwaad offset izhichigewinan. Iwe gaaban ganedat izhichigewin gemaa inaakonigewin bizaanigo daa-inenjigaade agami-akiing ji-ayaamagak gemaa akiikaaning eta.

Izhichigewin ge-izhichigemagak

Gaawiin gakina izhichigewinan daa-onji-ozhi'oomagazinooon gaaban ganedatan. Gaaban ganedat inaakonigewin da-ikidoomagan wegonen izhichigewinan ge-onji-ozhi'oomagakin gaaban ganedatan

GHGs Ge-Ganawaabanjigaadegin

Aanawi niibiwa dinookaanan izhichigewinan daa-onizhishinooon, GHG gaaban ganedat izhichigewinan da-aabadanoon nawach bangii ge-bagidinigaadeg gemaa odaapinigaadeg gaa-naagwasinog ishpiming. Bebakaan dino gaaban ganedat izhichigewinan nawach bangii ji-bagidinigaadegin gemaa ji-odaapinigaadegin ini GHGs. Mitigwaki izhichigewinan odazhiikaanaawaa CO₂, ini dash webinigani-izhichigewinan anaamakamig gaa-ayaamagak gaa-naagwasinog (CH₄) odazhiikaanaawaa. Gaaban ganedat izhichigewin gemaa inaakonigewin daa-ikidoomagan giishpin nawach bangii GHG ji-bagidinigaadeg gemaa ji-odaapinigaadeg daa-onji-ozhi'oomagan gaaban ganedatan.

